



KEMENTERIAN PERDAGANGAN DALAM NEGERI
DAN KOS SARA HIDUP

TEKS UCAPAN

**YB DATUK SERI SALAHUDDIN BIN AYUB
MENTERI PERDAGANGAN DALAM NEGERI
DAN KOS SARA HIDUP (KPDN)**

SEMPENA

**MAJLIS PENYAMPAIAN GERAN KAJIAN, PEMBANGUNAN,
DAN/ ATAU PENGKOMERSILAN (R&D&C) PROGRAM
KHAZANAH ALAM INDUSTRI JUALAN LANGSUNG SERTA
PENYERAHAN LESEN JUALAN LANGSUNG**

PADA
29 MAC 2023 (RABU)

TEMPAT
KPDN, PUTRAJAYA

Terima kasih saudara/ saudari pengacara majlis

Yang Berhormat Senator Puan Hajah Fuziah binti Salleh

Timbalan Menteri

Perdagangan Dalam Negeri dan Kos Sara Hidup

Yang Berbahagia Datuk Azman bin Mohd Yusof

Ketua Setiausaha

Kementerian Perdagangan Dalam Negeri dan Kos Sara Hidup

Yang Berbahagia Datin Sylvia Koh

Presiden Malaysian Direct Distribution Association (MDDA)

Yang Berusaha Encik Mohamad Zaihan Mohamed Ariffin

Timbalan Presiden Direct Selling Association of Malaysia
(DSAM)

Pegawai-Pegawai Kanan Kementerian Perdagangan Dalam
Negeri dan Kos Sara Hidup

Rakan-rakan media

Tuan-tuan dan puan-puan serta wakil-wakil daripada syarikat jualan langsung.

Assalamualaikum WBT dan Salam Sejahtera.

PENDAHULUAN

1. Pertama sekali saya mengucapkan terima kasih kerana dapat kita bersama-sama pada hari ini hadir ke Majlis Penyampaian Geran Kajian, Pembangunan, dan/ atau Pengkomersilan (R&D&C) Program Khazanah Alam Industri Jualan Langsung serta Penyerahan Lesen Jualan Langsung.
2. Sesungguhnya, majlis ini amat signifikan sebagai manifestasi terhadap usaha tanpa jemu pihak KPDN dan juga Kerajaan dalam membangun dan mengembangkan industri jualan langsung negara, sejajar dengan aspirasi Kerajaan melalui konsep Malaysia Madani untuk melihat kemakmuran negara dapat dikongsi secara adil, saksama dan inklusif kepada semua lapisan masyarakat.

PERANAN KPDN DALAM MENGAWAL SELIA INDUSTRI JUALAN LANGSUNG

Para hadirin yang dihormati sekalian,

3. Bermula pada tahun 2009, peranan dan fungsi KPDN telah diperluaskan dalam usaha membangunkan industri jualan langsung negara sejajar dengan visi Kementerian untuk menjadikan Perdagangan Domestik Tunjang Ekonomi Berpendapatan Tinggi.
4. Dalam hal ini, KPDN di bawah Bahagian Pembangunan Francais dan Jualan Langsung (BPFJL) bertanggungjawab untuk mengawal selia industri jualan langsung selaras dengan peruntukan Akta Jualan Langsung dan Skim Anti Piramid 1993 [Akta 500] termasuk Garis Panduan, Peraturan dan Syarat Lesen yang berkuatkuasa.

PERTUMBUHAN INDUSTRI JUALAN LANGSUNG NEGARA

5. Industri jualan langsung telah menunjukkan impak positif melalui sumbangan kepada pertumbuhan ekonomi negara khususnya ketika seluruh dunia dilanda pandemik Covid-19. Industri ini kekal aktif menjalankan pemasaran

perniagaan secara atas talian untuk mempromosikan produk-produk jualan langsung. Ramai ahli dan agen yang dilantik, mendapat bonus dan komisyen hasil penjualan produk jualan langsung seterusnya berjaya membantu menambah pendapatan walaupun negara sedang bergelut menempuh cabaran kemerosotan ekonomi pasca pandemik.

6. Industri ini juga telah memberi sumbangan yang signifikan dan impak berganda yang positif di Malaysia dan di luar negara kerana telah membantu lebih dari dengan **empat (4) juta** agen atau wakil jualan yang sah dan kekal aktif sehingga kini. Sebagai agen atau wakil jualan yang sah, individu boleh menjual produk penjagaan diri dan rumah, kosmetik, makanan/ minuman tambahan serta kesihatan dan lain-lain produk yang telah diluluskan di bawah syarikat Jualan Langsung yang sah. KPDM menjangkakan akan berlaku peningkatan terhadap jumlah rakyat Malaysia yang berminat untuk menyertai bidang perniagaan jualan langsung pada masa akan datang kerana ia merupakan salah satu peluang kerjaya untuk memperoleh pendapatan tambahan.

Para hadirin yang dihormati sekalian,

7. KPDN amat berbangga dengan prestasi dan pencapaian industri jualan langsung di Malaysia yang kini berada pada **kedudukan nombor enam (6) di dunia dan nombor empat (4) di rantau Asia Pasifik** mengikut Laporan Jualan Peruncitan Jualan Langsung Global 2020. Pengiktirafan ini merupakan pencapaian unggul Malaysia dalam meletakkan negara kita setanding dengan industri jualan langsung seperti Amerika Syarikat dan Korea Selatan.

8. Kerajaan juga amat menghargai sumbangan industri jualan langsung iaitu melalui rekod jualan pada tahun 2021 yang mencatatkan nilai sebanyak RM27.03 bilion, iaitu peningkatan 5.3% berbanding RM25.67 bilion pada tahun 2020. Tahniah diucapkan.

KERJASAMA KPDN BERSAMA *DIRECT SELLING ASSOCIATION OF MALAYSIA (DSAM)* DAN *MALAYSIAN DIRECT DISTRIBUTION ASSOCIATION (MDDA)*.

Hadirin yang dihormati sekalian,

9. Terdapat dua (2) pertubuhan bukan kerajaan atau *Non-Governmental Organisation* (NGO) yang menerajui perkembangan jualan langsung Malaysia iaitu Persatuan Jualan Langsung Malaysia atau *Direct Selling Association of Malaysia* (DSAM) dan Persatuan Edaran Terus Malaysia atau *Malaysian Direct Distribution Association* (MDDA).
10. Dalam hal ini, bagi memudahkan pengawalseliaan industri jualan langsung di Malaysia, syarikat jualan langsung adalah disyarat dan diwajibkan untuk berdaftar dan menyertai salah satu daripada persatuan tersebut. Ini adalah penting kerana kedua-dua persatuan ini dapat membantu syarikat dalam mendepani cabaran dan menerokai potensi industri jualan langsung sama ada di dalam mahupun di luar negara.
11. Bagi menjamin hala tuju industri jualan langsung kekal cemerlang dan maju pada masa akan datang, KPDM bersama-sama DSAM dan MDDA akan sentiasa mengamalkan *no wrong door policy* serta *ease of doing business* dengan syarikat atau pemegang lesen bagi berbincang, mendengar dan bekerjasama untuk membangunkan persekitaran sihat melalui imej positif

jualan langsung agar industri ini kekal relevan sebagai pilihan kepada masyarakat untuk menjana pendapatan.

INISIATIF GERAN KAJIAN, PEMBANGUNAN, DAN PENGKOMERSILAN (R&D&C) KHAZANAH ALAM JUALAN LANGSUNG

Para hadirin yang dihormati sekalian,

12. KPDN komited untuk terus merencanakan gerak langkah bagi merancang strategi pelaksanaan pembangunan industri jualan langsung yang lebih holistik secara berterusan pada masa akan datang.

13. Sebagai permulaan kepada komitmen ini, KPDN melalui peruntukan yang diberikan telah mewujudkan inisiatif pemberian Geran Kajian, Pembangunan, dan Pengkomersilan (R&D&C) bagi menyokong pengembangan industri jualan langsung bertemakan 'Khazanah Alam Jualan Langsung'.

14. Pelaksanaan inisiatif pemberian Geran R&D&C bertujuan untuk memperkembangkan perniagaan jualan langsung khususnya kepada syarikat jualan langsung yang mengeluarkan dan memasarkan produk tempatan berasaskan sumber alam semula jadi seperti gamat, tongkat ali, kacip fatimah, pegaga, moringa, lidah buaya, ubi jaga dan sebagainya serta membantu syarikat mengkomersilkan produk jualan langsung.
15. Dalam hal ini, KPDN telah meluluskan permohonan bagi pemberian Geran R&D&C ini kepada 8 syarikat jualan langsung dan satu (1) badan berkanun di mana penerima-penerima geran ini akan diraikan melalui penyampaian geran pada majlis hari ini.
16. Kementerian percaya bahawa pemberian geran ini akan dapat meningkatkan dan memajukan industri jualan langsung serta yakin ianya akan dapat memberi nilai tambah kepada produk-produk khazanah alam tempatan.

LESEN JUALAN LANGSUNG

17. Majlis pada hari ini akan turut melibatkan sesi penyerahan 68 Lesen Jualan Langsung termasuk 14 Lesen untuk syarikat jualan langsung baharu yang akan disampaikan kepada pemegang saham dan pengarah syarikat yang hadir pada hari ini.
18. Sehingga 1 Mac 2023, sebanyak 407 Lesen Jualan Langsung telah diluluskan oleh KPDN dan masih sah untuk syarikat menjalankan perniagaan jualan langsung mengikut Akta 500, dengan tempoh kelulusan lesen adalah di antara satu (1) sehingga lima (5) tahun.
19. Kementerian ingin menasihati semua pemegang Lesen Jualan Langsung untuk mematuhi segala peraturan yang telah digariskan demi menggalakkan pertumbuhan dan perkembangan aktiviti jualan langsung yang beretika di samping peka terhadap hak-hak serta kepentingan pengguna.

20. Kementerian yakin industri jualan langsung akan dapat terus berkembang secara holistik dan lebih cemerlang pada masa akan datang, di samping mampu menonjol sebagai salah sektor yang mampu menyumbang kepada pertumbuhan sosio-ekonomi Negara.

21. KPDN juga akan meneruskan agenda untuk merancakkan lagi pembangunan industri jualan langsung melalui usaha untuk mendaya upaya perkhidmatan dan produk jualan langsung sebagai salah satu strategi untuk membuka peluang perniagaan, peluang pekerjaan kepada segenap lapisan masyarakat khususnya kepada golongan B40 dan M40, di samping mengawal selia industri ke arah pewujudan ekosistem perniagaan yang lebih kondusif serta dinamik.

PENUTUP

22. Setinggi-tinggi ucapan tahniah diucapkan kepada semua syarikat yang akan menerima geran dan Lesen Jualan Langsung pada hari ini. Semoga ianya akan menjadi pemangkin kepada lebih daya usaha ke arah meningkatkan perkembangan industri yang lebih mampan dan berdaya saing.

23. Sekali lagi saya ingin mengambil kesempatan ini untuk mengucapkan penghargaan dan terima kasih kepada semua pihak yang terlibat dalam menjayakan Majlis Penyampaian Geran Kajian, Pembangunan, dan/ atau Pengkomersilan (R&D&C) Program Khazanah Alam Industri Jualan Langsung serta Penyerahan Lesen Jualan Langsung pada hari ini.

24. Akhir kata, pantun khas untuk hadirin sekalian:

Jualan dari pintu ke pintu,
Kini beralih ke atas talian,
Jualan langsung meningkat mutu,
Industri berkembang jadi kebanggaan.

Sekian, salam hormat dan terima kasih.